

Igls meis da november 2020 ò la suprastanza communal tracto tranter oter igls affars suandonts:

Immobiglias, santieri e fatgs da sepultura, provedimaint d'ava

- Decidia da vender las suandontas quatter immobiglias communalas tgi vignan betg ple duvradas: anterioura tgesa da scola agls Mulegns, anterioura tgesa da scola a Rona, anterioura tgesa communal a Marmorera e la tgesa sen parc. nr. 41 (Sumvei 42) a Tinizong. Schi spert tgi las immobiglias èn valetadas vign la vendita publitgeida aint igls figls uffizials digl cumegn da Surses.

Fatgs general, fatgs da personal, economia e provedimaint d'energeia

- Piglia cunaschiantscha dallas activitads digls utilisaders dalla pagina d'internet digl cumegn cun Google-Analytics. Surdo l'incumbensa alla tipic.ch ScRL da furmar da nov la pagina d'internet cun far diversas adattaziuns.
- Piglia cunaschiantscha digl rapport da revisiun dalla Curia Treuhand SA pertutgont igl rendachint 2019 e piglia posiziun tar las recumandaziuns e maseiras proponendas.
- Delibero igl credit per la compra d'en vehichel nov dalla marca Toyota LandCruiser per la gruppa da cumegn, scu ramplazzamaint digl vehichel vigl digl anteriour cumegn da Riom-Parsonz.
- Decidia d'externalisar l'informatica digl cumegn ainten en center da datas dalla Abraxas Informatik SA.
- Decidia da prolungar la garanzeia da deficit an favour dalla Canorta Tgimirola a Savognin a parteir digl onn da gestiun 2021/22 per 3 onns e concedia en credit da fr. 14'236.00 per onn per cofinanztgier en post d'administraziun, tenor ena clav da repartiziun digls costs dalla Regiun Alvra.
- Piglia posiziun sen la dumonda digl martgea da Turitg da piglier se las tractativas per la concessiun davart l'utilisaziun dall'ava dalla Gelgia e dall'Ava da Nandro, an vista alla scadenza dalla concessiun correspondentia ed igl return digl implant igl onn 2035.

Siertad publica e traffic

- Fixo da nov la practica per las lubientschas da parcar a Tigignas e Cresta da Lai. Da nov vign reservo per las ustareias e per las persungas cun domicil an Val Nandro mintgamai en parcadi a Tigignas. Persungas cun abitaziuns da vacanzas sen las aclas dalla Val Nandro e Parsonz survignan a parteir dad ossa angal anc 1 lubientscha da parcar pro abitaziun.
- Piglia posiziun sen la decisiun negativa digl Uffezi federal per veias (UVIAS) pertutgont la dumonda digl cumegn d'introduceir ena zona da tempo 30 sen igl Stradung a Savognin sen igl toc digl hotel Pianta anfignen tar la strefla melna a Son Mitgel e dumando da reponderar la decisiun.
- Decidia da recumandar agls giasts ed alla populaziun da desister da far eir rachetas e d'anvidar petardas a Silvester. La decisiun è neida fatga an consultaziun cun igl cumandant da pumpiers, la TSBA SA scu er cun igl vendader da fis artificials a Savognin.

Turissem

- Decidia da prolungar las cuvagnientschas da prestaziun existentas cun las impresas Marco Jäger Transporte/Taxi e Mountain Tour Bergün ScRL da Jürg Fasser concernent divers transports da persungas an vista agl travagl digl bus da viandar e velo per la stad 2021.

Fatgs da construcziun, planificaziun digl territori e planisaziun locala

- Decidia da vender a Reto Carisch ed Angela Eggmann la parcella da biagier nr. 7153 Sot Gassetta, Riom, an possess digl cumegn. La vendita succeda tenor las cundiziuns tg'igl uriund cumegn da Riom-Parsonz veva fixo. La parcella ò ena surfatscha da 461 m² e sa catta ainten la zona per indigens W1.

Ambiant, agricultura, ragns ed uals, alps e pastgiras

- Piglia cunaschientscha dall'idea da project «inventarisaziun tgamons» dall'uniun Parc Ela da Stierva anfignen Cré digl Lai (Salouf). Ena finanziaziun dall'inventarisaziun digls tgamons an Val Nandro è neida negada.

Ovras communalas incl. infrastruttura turistica, economia forestala

- Decidia da realisar en pumptrack (pista circulara per velos da muntogna cun ondas ed oters elemaints) a Savognin, aint igl conturn digl Lai Barnagn. Per la decisiun davart igl li è la suprastanza sa basada sen igl resultat dalla retschertga fatga tar la populaziun ed igls possessours d'abitaziuns secundaras. Radond 240 persungas èn sa participadas alla retschertga.
- Piglia posiziun sen la dumonda dalla fundaziun «Schatzinsel Alp Flix» an vista agl giubileum da 20 onns igl onn 2023 e decidia da prolungar igl contract da locaziun existent pertutgont la tgesa da perscrutaziun a Salategnas, Alp Flex.
- Concedia en credit supplementar da fr. 120'000.00 per reparar igls donns caschunos tras lenna tarada digl vent perveia digls orcans igl fanadour ed otgover, per evitar tgi igl scorset sa derasa.

Tinizong, igls 14-12-2020

Suprastanza communal Surses